

V E N D I M
Nr.289, datë 24.4.2003

PËR KRITERET DHE PËRBËRJEN E KËSHILLAVE MBIKËQYRËS TË SHOQËRIVE ANONIME, SHTETËRORE

Në mbështetje të nenit 100 të Kushtetutës dhe të nenit 2 të ligjit nr.8885, datë 22.4.2002 "Për disa ndryshime në ligjin nr.7926, datë 20.4.1995 "Për transformimin e ndërmarrjeve shtetërore në shoqëri tregtare"" , me propozimin e Ministrit të Ekonomisë, Këshilli i Ministrave

V E N D O S I:

1. Këshillat mbikëqyrës të shoqërive anonime, shtetërore të krijuara nga transformimi i ndërmarrjeve shtetërore, në sektorë strategjikë përbëhen nga 6 (gjashtë) anëtarë, kurse në shoqëritë e vogla dhe të mesme, nga 3 (tre) anëtarë.

2. Anëtarët e këtyre këshillave përzgjidhen si më poshtë vijon:

a) 2/3 e numrit nga kandidaturat e propozuara nga ministritë e linjës administrative ose organet e qeverisjes vendore;

b) 1/3 e numrit nga kandidaturat e propozuara nga Ministria e Ekonomisë.

3. Anëtarë të këshillave mbikëqyrës mund të emërohen punonjës të organeve të qeverisjes qendrore dhe vendore, si dhe punonjës të universiteteve e institucioneve kërkimore dhe shkencore, kur legjislacioni nuk pengon pjesëmarrjen e tyre.

4. Kandidatët për anëtarë duhet të jenë diplomuar ose specializuar në degë të njëjta ose të përafërta me objektin e veprimtarisë së shoqërisë. Kandidatët për anëtarë në këshillat mbikëqyrës të shoqërive anonime, që veprojnë në sektorët strategjikë, të përfshirë në listën që i bashkëlidhet këtij vendimi, duhet të kenë përvojë pune jo më pak se pesë vjet. Ministri i Ekonomisë përcakton rregullat për verifikimin e dokumentacionit përkatës.

5. Nuk mund të emërohen anëtarë të këshillave mbikëqyrës personat që nuk janë në marrëdhënie pune me shtetin, punonjës të organeve të qeverisjes qendrore ose vendore, që kryejnë funksione kontroll-revizioni, punonjës të drejtorive të shoqërive tregtare, drejtorë të ndërmarrjeve shtetërore të patransformuara në shoqëri tregtare.

6. Ministri i Ekonomisë emëron anëtarët e këshillave mbikëqyrës në mbështetje të propozimeve të ministrive dhe organeve të qeverisjes vendore, në përputhje me raportet dhe kriteret e mësipërme.

7. Këshilli i Ministrave miraton përbërjen e këshillave mbikëqyrës të shoqërive anonime shtetërore, që veprojnë në sektorin strategjik, sipas listës që i bashkëlidhet këtij vendimi, me propozimin e Ministrit të Ekonomisë.

8. Këshilli mbikëqyrës zgjedh, në mbledhjen e tij të parë, kryetarin dhe nënkryetarin, të cilët propozohen nga Ministri i Ekonomisë. Kandidaturat për kryetar dhe nënkryetar të këshillave mbikëqyrës të shoqërive anonime shtetërore, që veprojnë në sektorin strategjik, sipas listës që i bashkëlidhet këtij vendimi, propozohen nga Kryeministri.

9. Këshillat mbikëqyrës i raportojnë ministrit të linjës administrative dhe Ministrit të Ekonomisë, me cilësinë e përfaqësuesit të pronarit shtetëror, për ecurinë e zbatimit të programit të zhvillimit ekonomik dhe financiar, sa herë që e gjykojnë të nevojshme ose sa herë që kërkohet prej tyre, por jo më rrallë se një muaj pas mbylljes së çdo 3-mujori.

10. Ministria e Rregullimit të Territorit dhe e Turizmit, në propozimet për këshillat mbikëqyrës të shoqërive të furnizimit me ujë dhe të largimit të ujërave të përdorura, bashkërendon punën me organet përkatëse të pushtetit vendor, për përfaqësimin e tyre.

11. Anëtarët e këshillave mbikëqyrës përfitojnë shpërblim mujor për veprimtarinë drejtuese të shoqërisë, që fillon nga mbledhja e parë, shpërblim, i cili përballohet nga shoqëria. Shpërblimi për kryetarin është 30 për qind, për nënkryetarin 25 për qind dhe për anëtarët e këshillit 20 për qind e pagës mujore të drejtorit të shoqërisë.

12. Anëtarët e këshillit mbikëqyrës mund të përfitojnë shpërblim vjetor në rastet kur realizohet fitimi i programuar dhe treguesit kryesorë, të përcaktuar në kontratën vjetore për administrimin dhe drejtimin e shoqërisë anonime. Ky shpërblim nuk mund të tejkalojë vlerën e dy pagave mujore të

drejtorit të shoqërisë dhe miratohet nga Ministri i Ekonomisë, pas mbylljes së llogarive vjetore.

13. Ndërsa për shoqëritë e dhëna tërësisht me qira ose enfiteozë, që nuk ushtrojnë veprimtari prodhuese, shpërblimi për kryetarin është 7 për qind, për nënkryetarin dhe për anëtarët 5 për qind të pagës mujore të drejtorit.

14. Vendimi nr.66, datë 24.2.2000 i Këshillit të Ministrave “Për këshillat mbikëqyrës të shoqërive anonime, shtetërore”, i ndryshuar, si dhe aktet e tjera nënligjore, që bien në kundërshtim me këtë vendim, shfuqizohen.

15. Ngarkohen Ministria e Ekonomisë, ministrinë e linjës administrative dhe organet e qeverisjes vendore që, brenda 3 muajve nga miratimi i këtij vendimi, të rishikojnë përbërjen e këshillave mbikëqyrës, në përputhje me kriteret e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

Fatos Nano

Lista e disa shoqërive anonime shtetërore që veprojnë në sektorët strategjikë

Nr	Emërtimi i shoqërive	Vendndodhja	Varësia administrative	% e kapitalit shtetëror	Numri i anëtarëve të këshillit mbikëqyrës	Vërejtje
1	ShA ANTA	Tiranë	M.Transportit dhe Telekomunikacionit	100	6	
2	ShA Albtransporti	Tiranë	M.Transportit dhe Telekomunikacionit	100	6	
3	ShA Drejtoria e Përgjithshme e Hekurudhave	Durrës	M.Transportit dhe Telekomunikacionit	100	6	
4	ShA Autoriteti Portual	Durrës	M.Transportit dhe Telekomunikacionit	100	6	
5	ShA Telecom	Tiranë	M.Transportit dhe Telekomunikacionit	100	6	
6	ShA Posta Shqiptare	Tiranë	M.Transportit dhe Telekomunikacionit	100	6	
7	ShA Albpetrol	Fier	M.Industrië dhe Energjetikës	100	6	
8	ShA Armo	Fier	M.Industrië dhe Energjetikës	100	6	
9	ShA SERVCOM	Fier	M.Industrië dhe Energjetikës	100	6	
10	ShA KESH	Tiranë	M.Industrië dhe Energjetikës	100	6	
11	ShA Ujësjiellës Tiranë (qytet, fshat)	Tiranë	M.Reg.Territorit dhe Turizmit	100	6	